



**Inatsisartut aalajangiiffigisassaattut siunnersuut Naalakkersuisut peqquneqassasut Naalagaaffimmi oqartussaasunut saaffigineqqullugit, qulakkeerniarlugu Kalaallit Nunaata killilersorneqanngitsumik Istanbulimi isumaqatigiisummut ilanngunnissaa. Tamanna pissaaq (UPA2022) pisinnagu.**

(Inatsisartunut ilaasortaq Anna Wangenheim, Demokraatit)

(Siullermeerneqarnera)

**Inatsisartut aalajangiiffigisassaattut siunnersuut Naalakkersuisut peqquneqassasut aningaasanik immikkoortitsinissaannik persuttaanerup minnerunngitsumillu angerlarsimaffimmi persuttaanerup akiorniarnissaa ersarissumik anguniarlugu, inuiaqatigiinni 2025-mi persuttaanerit amerlassusaat ullumikkumut sanilliullugit 25 procentimik apparsimassasut. Paasisitsiniaaneq kingusinnerpaamik 1. august 2022 aallartinneqassaaq 31. december 2024-ip tungaanut ingerlanneqassalluni.**

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Siunnersuummut tapersornartumut Demokraatit Inatsisartuni ilaasortaatitaannut Anna Wangenheimimut qujanaq.

Ukorsiiaa; isiginngitsuusaaginnarsinnaanngilagut, meeqqat taama amerlatigisut angerlarsimaffinni persuttaaffiusuni peroriartornerat. Isiginngitsuusaaginnarsinnaanngilagut, taama amerlatigisut aapparissaminnit persuttartittarneri. Angerlarsimaffik tassaasariaqarpoq asanninnermik ulikkaartoq, toqqissisimaffiusoq pitsaasorlu aammalu eqqissisimaarfik nukissanillu katersiffik. Ajoraluartumilli angerlarsimaffiit tamarmik taamaanngillat. Angerlarsimaffiit amerlavallaat toqqissisimanngiffiupput persuttaaffiullutillu.

Tulluusimaarutigaa, parteeqatima suliaq una allanngueqataaffigerusummagu. Maani Inatsisartuniinnaanngitsoq siunnersuutinik saqqummiussinngilaq, tunniusimaqalunili paasisitsiniaassutigai ajornartorsiutit tusagassiutitigut, inuit naapittarfiisigut Nuummilu aqqusinnermi. Suliaq maligassiunerusoq aammalu pisariaqartumik ukkatarinninnermik kinguneqarumaartussaq.

Akerlianilli Naalakkersuisut ileqqutoqqat atorussuppaat, iliiusissatut pilersaarusiorusullutik. Tassunga ima oqarusuppunga: Qanorsuaq iliiusissatut pilersaarusiorusukkussi. Iliiusissatulli pilersaarusiornissi persuttaanermut akiuniarluni tapersersortissarsiorneq ajoquserniaqinasiuk, Anna Wangenheimimit uani siunnersuutigineqartoq. Annikippallaassaqaq.

Siunnersuutit uku taperserluarneqartariaqarput. Taamaattumik Demokraatiniit innersuussutigaarput, aallaqqaammut tapersersortissarsiornissamik siunnersuut aaliangiunneqassasoq, Naalakkersuisullu allannguutissatut siunnersuutaat itigartinneqassasoq. Istanbulimut isumaqatigiisummut ilanngunnissamut siunnersuummut tunngatillugu, Demokraatit innersuussutigarusuppaat ataatsimiititaliap misissussagaa,



qanoq ililluta sukkanerpaamik isumaqatigiissummut ilanngussinnaanersugut. Tamassuma kingorna taperserumaarparput.

Taamatut paasinnilluta siunnersuutit Ilaqutariinnermut- Peqqissutsimullu ataatsimiititaliamut suliasanngorlugit ingerlateqqinneqarnissaat innersuussutigaarput.